

每週經課朗誦經文(巴克禮漢羅/教羅)2013/03/10

共同經課 - 1 約書亞記五章九節~十二節

9 耶和華對約書亞講：我今 á 日將埃及 ê 凌辱移徙離開 lín；tùi án-ni, hit 所在名叫 Kiat-kah, 直到今 á 日。10 Hit 時以色列人紮營 tī Kiat-kah；hit 月十四 ê-hng, tī 耶利哥 ê 平洋守 poáⁿ 過節。Il poáⁿ 過節 ê 隔日 in 就食 hit 所在所出 ê, tú-tú hit 日食無酵餅 kap 烘 ê 五穀；12 in 食 hit 所在所出 ê, 隔日 má-ná 就停歇；以色列人也無 koh 有 má-ná；hit 年 in 就食迦南地 ê 土產。

共同經課 - 2 詩篇三十二篇

1 大衛 ê 教示 ê 詩。1) 過失得 tiòh 赦免, 罪過得 tiòh 遮蓋 ê, 這人有福氣。2 耶和華無算伊做有罪, 伊 ê 心無奸詐 ê, 這人有福氣。3 我靜靜 ê 時, 我 ê 骨頭枯焦；因為我 thong 日大聲哮。4 因為暝日你 ê 手重重 chhih 我；我 ê 精液變親像夏天 ê 乾燥。[Sè-láh]5 我對你排列我 ê 罪過, 無隱瞞我 ê 罪惡；我講, 我 beh 對耶和華承認我 ê 過失；你就赦免我犯法 ê 罪。[Sè-láh]6 因為 án-ni, 見若虔誠 ê 人, tī thang chhē-tiòh 你 ê 時, tiòh 祈禱你。大水氾濫 ê 時, 的確 boē 到伊 hia。7 你是我閃 bih ê 所在；你 beh 庇佑我脫離艱苦；你 beh 用得救 ê 歌四面圍我。[Sè-láh]8 我 beh 教示你, 指示你應該行 ê 路；我 beh 注目看你, 來勸解你。9 M-thang 親像 bé, lô, in 無知識；Tiòh 用 bé-ka-kiuⁿ bé-lèk-soh 約束 in, 若無, in 就 m̄ oá 近你。10 Pháiⁿ 人受 choē-choē 苦難；獨獨 oá 靠耶和華 ê 人 beh 有慈愛四面圍伊。Il Lín 義人 ah, tiòh 因為耶和華來歡喜快樂；心正直 ê 人 ah, lín tiòh 出歡喜 ê 聲。

共同經課 - 3 哥林多後書五章十六節~二十一節

16 所以阮 tùi taⁿ 以後, 無照肉體 bat 人；雖然 bat 照肉體 bat 基督, taⁿ 以後無 koh án-ni bat 伊。17 所以人若 tiàm-tī 基督, 就是做新創造 ê, 舊 ê tai-chi 已經過去, taⁿ lóng 變成新 ê。18 Koh 萬項事 lóng 是出 tī 上帝, 伊 tùi 基督 hō 咱 kap 伊 koh 和, 也將 chit-ê 勸人 kap 上帝 koh 和 ê 職份 hō 阮；19 就是上帝 tiàm-tī 基督, hō 世間 kap 伊 koh 和, 無將 in ê 罪過歸 tī in；也將 koh 和 ê 道理交託阮。20 Án-ni 阮為 tiòh 基督做欵差, 親像上帝用阮勸 lín；阮為 tiòh 基督求 lín kap 上帝 koh 和；21 上帝 hō hit-ê 無罪 ê 替咱成做罪, 是 beh hō 咱 tiàm-tī 伊來成做上帝 ê 義。

共同經課 - 4 路加福音十五章一節~三節, 十一 b 節~三十二節

1 眾抽餉 ê Kap pháíⁿ 人 teh 就近耶穌來聽伊, 2 法利賽人 kap 經學士 ngáuh-ngáuh 念講, Chit-ê 人接納 pháíⁿ 人, 續 kap in 食。3 耶穌設 chit-ê 譬喻對 in 講, Il 某人有兩個 kiáⁿ；12 hit-ê 第二 ê Kā 老父講, 阿爸 ah, 將我應得 ê 業, 分 hō 我。伊 ê 老父就 kā in 分家伙。13 Koh 無幾日, hit-ê 第二 kiáⁿ 一盡收拾伊 ê 物, 出外去遠遠 ê 所在；tī hia 放蕩毀壞伊 ê 業。14 已經 sng 了了, tú-tiòh hit 所在大飢荒, 伊 chiah 知欠缺 ê 艱苦。15 就去 oá Hit 所在一個百姓；hit 人差伊去山裡飼豬；16 ài 將豬所食 ê 豆 koeh 來止饑, 也無人 hō 伊。17 伊醒悟就講, 我 ê 老父有 joā choē 長工, 米糧食有 chhun；但是我 tī chia teh-beh 餓死 ah。18 我 beh 起來去 chhē 我 ê 老父, kā 伊講, 阿爸 ah, 我有得罪天 kap tī 你 ê 面前；19 taⁿ 了後我 boē 堪得叫做你 ê Kiáⁿ, tiòh hō 我親像你 ê 長工 ê 一個。20 就起來去 chhē 伊 ê 老父。相離 iáu-kú 遠, 伊 ê 老父看見伊, 就憐憫伊, 走去抱伊 ê 領頸, 直直 kā 伊 chim。21 Kiáⁿ 就 kā 伊講, 阿爸 ah, 我有得罪天 kap tī 你 ê 面前；taⁿ 了後 boē 堪得叫做你 ê Kiáⁿ。22 但是老父對伊 hiah-ê 奴僕講, 緊緊 hiaⁿh siōng 好 ê 衫來 kā 伊穿, koh kā 伊掛手指, 續 kā 伊穿鞋；23 也牽 hit 隻肥 ê 牛 á 來 thài, 咱食來歡喜。24 因為我 chit-ê Kiáⁿ 死有 koh 活, 失落有 koh 得 tiòh。In 就 saⁿ-kap 歡喜。25 Hit 時伊 ê 大 kiáⁿ tī 園裡；tò 來 beh 到厝, 聽見作樂 kap 跳舞 ê 聲。26 就叫一個奴僕來問伊 teh 啥事。27 伊 kā 伊講, Lín 小弟來 lah；lín 老父因為得 tiòh 伊好好 tò 來, 所以 thài hit 隻肥 ê 牛 á。28 大 kiáⁿ 受氣, m̄ 入去；伊 ê 老父出來勸伊。29 伊應伊 ê 老父講, 你看, 我服事你 hiah choē 年, lóng bē bat 違逆你 ê 命令；你也 bē bat hō 我一隻羊 á-kiáⁿ, thang kap 我 ê 朋友 saⁿ-kap 歡喜。30 總是你 chit-ê kiáⁿ, 交陪娼妓, 一盡破費你 ê 業, 一下 tò 來, 你就為 tiòh 伊 thài 肥 ê 牛 á。31 老父就 kā 伊講, Kiáⁿ ah, 你常常 kap 我 tī-teh, 凡我所有 ê lóng 是你 ê；32 但是你 chit-ê 小弟死有 koh 活, 失落有 koh 得 tiòh, 咱應該 tiòh 歡喜快樂。